



Mission Consultation (Pastor leh Pro. Pastor te) 16 - 03 - 2023



Mission Consultation (Khristian Khanglai Pawl) 17 - 03 - 2023

To,

If undelivered please return to - TPC Office,
 P.O. Box - 107
 D. Phailian,
 Churachandpur - 795128
 Manipur, India



LENGPA VAIDAWN HITIU

- Jesu Thawkna Chithum
- Thina Dozo In A Thokit Tai
- Lapawl Ah Lal Nasep



Editor : Rev. S. Lama Vaiphei, Executive Secretary
Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hawipakkim, Secretary, CKNP
 : Upa Genminlun, Secretary, CKKP
Business Manager : Pu Lalbiaklian, Office Superintendent
 TPC Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. LENGPA VAIDAWN HITIU (PALM SUNDAY)	04
4. JESU THAWKNA CHITHUM (GOOD FRIDAY)	08
5. THINA DOZO IN A THOKIT TAI (EASTER SUNDAY)	13
6. LAPAWL AH LAL NASEP	16
7. SERMON	
a) Dangka sum ngainatna	20
b) Pathian galvan bukim in kivan un	23
c) Imu lai thawhal a hun tai	26
8. LA LEH A CHANCHIN	28
9. KNP HUANG	33
11. KKP HUANG	35
12. SUNNA	39

Moderator : Rev. Ngurthanmawia Sailo
 Secretaries : Rev. C. Lalrinliana (Sr.)
 : Rev. Thanglianlal (Jr.)
 Finance Officer : Rev. S. Khaikhawlam
 Statistician : Upa Kaikhokam
 Executive Secretary : Rev. S. Lama Vaiphei
 Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kochuam tin in Sunday School naupang leh piting i ngaikhawk zawk sêmna ding un dawn hitiu.
2. Palm Sunday, Good Friday leh Easter Sunday te hi kitup tak ah Kochuam tin in thagau lam malzawlina tawh i mat chiat theina ding in dawn hitiu.
3. Bial tin in Bial Kikhawmpi thagau lam malzawlina tawh buaina umlo ah i mat chiat theina ding un dawn hitiu.
4. I gam leilung, lui, gammâng, thing leh mau leh ganhingte phatak ah humbit leh etkawl a hi theina ding in dawn hitiu.

KHRISTA THAWKNA

I Lalpa Jesu'n nang leh kei â ding ah a thawkna huaisiat zia kilatna chu a lungngaina tuisuagiat gual ah lian leh a hepina tuisuagiat gual ah thuk hi a hi. Zia tuipei sung ah sanga umte mat la nawp chun a lui lai ahin lilu vang vang le chun, a taw va tung zo puan la tin, la thahatna zosia tawh zap galkai gaw le chunle galkai zo diaklo ding la hi.

Khrista thawkna hin thilpha bawl dan a hung hiatdaw thei khak ualeh ti ah i ettawn mai mai ding ua a thawk a hi pua, eimau ngei ah thilpha bawl nawpna a hung kisiamdaw theina ding zawk in a hi a thawk kha. Gitlo a pat i kivenbit ham ham ding uh ei dawisak pua, thilpha bawl nachang i hung hiat ua a phapen del ding ah Khrista Jesu thawkna apat siam i hi zawu a hi.

Khristian te'n haksatna i thawkzaw theina thugûk inei uh hi thil haksapi ei puai: bangkim i bawl zosiau hi mihing â ding gual ah bawllô in Lalpa â ding gual in bawl leu hen thuakzo mai ding i hiu.



Kochuam Huang

1. Tangphai Synod Mathil Consultation :

Tangphai Presbyterian Kochuam Synod hung hiding chu a mathil kikupkhawmna (Consultation) hun, 29.3.2023 (Nilaini) leh Jubilee Church ah mat hi ding a hi. Zia hun ahin Mizoram Synod ah Senior Executive Secretary hi lai Rev. C. Zoramawia, ei uh â ding ah A/S lui kha tawh Rev. H. Remthanga, Mizoram Synod ah kipat in, Resource Person in pang inau. Tangphai Synod a hung hi phatleh bang bang pawimaw ding a hi em, bang gual ah ma lak zel ding a hi em tite genkhawm in, hun matkhawm hi ding in guanggalna siam a hi.

2. Jiribam Kochuam Biakin hawanna leh latna :

Jiribam Presbyterian Kochuam Biakin chu, Upa T.

Manga Vaiphei, Moderator, Phaipi Presbytery in Ningani, March 23, 2023 ah khan hawanna leh latna a nei hi.

Chanchin chawmkim

Jiribam Presbyterian Kochuam hi November 23, 2003 ah khan phu ahin, Kochuam a kiphu in inkuan 5, Member 45 bep a hiu. Zia member-te haw chu Pau chuam chuam mang, Kochuam chuam chuam ah kipat hung kihuaikhawm a hiu.

June 2014 ah khan Bialtu Pastor, Rev. Lalpiaklian in Building suangphuna a nei a, zia ni apat khan Biakin sak nasepna chu a kipan ta a hi. Jiribam Kochuam Biakin sakna ding ahin kum 8 leh tha 9 vel hun sukbei ahin, sum le cheng Nuai sawmni pani (Rs. 2,200,000) vel sukbei a hi.

Jiribam Presbyterian Kochuam hawnni ah Kochuam statistics ziagual

HINNA VÂK

a hi:-

Inkuan zat	: 13
Member zosia zat	: 62
Pawsal zosia zat	: 30
Numei zosia zat	: 32
Kochuam Upa zat	: 01

Jiribam Kochuam chun Phaipi Presbytery Kikhawmpi
11-Veina (2022) kha lawtingtak in a la zintun uhi.



3. Revival Speaker-te Programme for April :

April tha sung ah Revival Speaker-te programme ziagual a hi:

1. ST Satboi V. Mulai April 7-9
2. Kamzathang L. Suangtun April 6-9

Pu VK Thanga hi taksa damlona ziak in a programme neisate
le cancel in a um ah, Kochuamte'n i pauchapnateu ah delzui
leuhin kipak um ina

“LENGPA VAIDAWN HITIU”

(Luka 19:28-40)

*Rev. T. Lalgin Vaiphei
i/c Phailianbung Pastor Bial*

Khawvel ah mihingte’n mi pawimaw i sak teu in a hung vê tak ua leh i thei kham kham un lopi tak in i vaidawn sek ua; tekhinna’n function vel ah Chief Guest i titeú a hung phatleh, mipite i dinsak sek ua, khenkhat chun khut le i bet sak sek ua, chutna nuam pen ah le i chut sak kit sek uh a hi. Zia bep chu hilo in, luaithena a um chun amau â dingah a chuam ah thil i guanggal piak sek ua, thilpiakte le i pe sek u a hi. In ah le zin pawimaw tak i nei tak leh, nawp a sak theina di pen ua pan a kila sek ah – In te i suthiang sek ua, me tui i huan piak sek ua, a lupna dingule le nuam deu ah i siam piak seku a hi.

Ziagual ma chun Jerusalem khawpi ah Jesu ava chia a khan, a nungzuite’n ama le lopi tak in a vaidawn uh a hi. Jesu kha vêl bangzat hem Jerusalem khawpi ah a chia ta, ahinla zia hun ah hin Jawlnei Zekariah thupuan guitunna dingin chia a hi (Zek. 9:9). Mipite lak a khan a vaidawn nuamlo khenkhat le a um ua (vv. 39), ahinla a nunzuite’n chawhawina tawh lopi tak in ala vaidawn ui.

Jesu kha a nungzuite’n a vaidawn gual un, ei uh gingtute’n le i hinkhuau ah Jesu hi vaidawn hitiu. I vaidawn thei ding dan uh thu chawmcha’n vak enkhawm hitiu:

1. Jesu chu thuawina tawh vaidawn hitiu (vv. 29-35):

Jesu leh a nungzuite kha Bethphage leh Bethani kua kiang, Oliv tang a tun un, a nungzuite pani kha sabiltungno, kuama chuan

HINNA VÂK

khâk nailona, tham ding leh kai ding in a sawl ah. A nungzuite'n le thumang tak in a va chiau ah, a hil gual tak in a va bawl un a hi. Zia bep chu hilo in Jesu chuanna ding in sabiltungno chung ah chun a puanteu a dâp nalai un, lampi dung ah le a puanteu a pha pek nalai ui.

Thuawina hi gingtu dik tak te mizia pakhat a hi. Zia hi Jesu nungzuite'n zia hun ahi a etsak bâk ua a gen khêl lam ah Jesu a chawihawi theina dingu thil le a bawl ui. Tulai gingtute hin Jesu thuawi hi haksa i sa ma ma ziang tau ah, "Jesu ka hepi hi" ti kigen sek ngal, i hinkhuau ah Ama i hepinatê'u mu phâk ding ah le um sek lo. Ziagual hinkhua i mat zing uh ahileh Jesu chu i hinkhuau ah i vaidawn thei na diam uh? Johan 14:15 na khan Jesu'n "**nang un lei hepiu leh ka thupiakte jawm in lau**" atia. A nungzuite'n a hepiu ah, a thupiakte te a awi ua, en le Jesu i hepi chun, a

thupiakte awi leh jui ding in kisa thak hitiu.

2. Jesu chu kingaitawmna tawh vaidawn hitiu (vv. 30-31):

Chang 30 na khan Jesu'n sabiltungno kai ding in nungzuite ava sawl ah; Jesu'n sabiltungno khel khel chung ah a chuan ziak hi a ziak a um ah: a pakhatna chun Jawlnei Zekariah thupuan a gui tunna di (Zek 9:9) ahia; a panina chun zia hun laia khan Leng leh Lalte'n gal dona dingah sakawl chungah a chuang sek ua; Chamna ding ahi phat leh sabiltung hi a pui sek u a hi. Zia tak ahin Jesu hi "**chamna**" tawh hung a hi ti thei a hi.

Jesu'n sabiltungno a mat ziak dang khat chu ahileh a mipite tawh kihiatthiam tuana/a mite dinmun hiatthiamna (connection/ understanding their situation) a nei nawp ziak a hi. Zia hun laia Judate kha Rome te nuai ah haksatna chuam chuam a thuak ua, a dinmun

uh a hiatthiam piak zia ah Lengte gual ah sakawl chung ah chuanglo in, kingaitawm tak ah sabiltungno chungah a chuang ah a mipite nasep piak leh hukdam dingin hung a hi. Sabiltungno hin Jesu “kingaitawm” dan te a sulang ah, zia hi Zekariah leh Bible thiamte gen dan chu ahi.

Sabiltung hi sakawl gual ah tai hatlo, bawngchal gual ah hatlo, ganhing neucha, mi nuainung takte bep in a mat seku, chun sâpte’n le “stupid animal” ti’n a gen sek ui. Ahinla Jesu’n chang 31 na khan **“Lalpa’n a dawina a um ah a hi”** ti’n a gen hi. Ziagual ma chun ei le a chang leh panna bei tia i kigel châng hun le um sek maithei – Insung hihenlang, kochuam leh khawtang ah hilehle; midang ngaidan apat hem ahiloleh ei leh ei i kingaidan apat hem ziagual lunggel i nei chângu le um ding in ka gingcha; ahinla Jesu hin ei dawina hi um ngei ngei ding a hi. Ama â ding ah

mi pawimaw tak i hi veku a hi. Sabiltung hi ganhing lakah le a nuainung pen hilehle Jesu’n a chawisang tho tho hi.

Jesu le kingaitawm tak ah alut gual in, en le kingaitawm tak ah Jesu hi i hinkhuau ah vaidawn hitiu. Gingtu diktak te chu a kingaitawm ua, a chapo ngai puau.

3. Jesu chu ginna tawh vaidawn hitiu (vv. 37-38):

“Lalpa min ah Lal hung chu a hampna e!” ti in a nungzui mipi zosiate chun aw ngai tak in a kiko ui. Zia tak ah a kikote hi ahiuleh Jesu gingtute ahiu ah – a thil lopi tak tak a bawlte hephate, mukhate ahiu hi. Amau hichu mi khenkhat a kiko zia ah kiko dawka a hi puau ah, Jesu kha a gin zia ah kiko a hi zawu.

Gingtu tak tak te’n Lal Jesu a hukdamtu ti ah a pawm thei zia chu ginna zia ah bep a hi. Ginna a panlo chun Lal Jesu i hinkhuau ah vaidawn ding hi thil haksa tak a hi. Ei leh ei kithêm mai mai ihu. Hebraite

HINNA VÂK

11:6 na a chun **“Ginna lo in Pathian chu sukkipak thei a hi puai; kuale Pathian kiang ah hung chun, ama chu a um ngei hi ti leh, ama hawlte chu kipakman pesek a hi, ti a ginchâk diu a hi.”** Zia châng ahin Pathian in Ama gingtute hinkhua ah a ngaikhawk pen chu Ama i ginnau hi a hi.

4. Jesu chu chawihawina tawh vaidawn hitiu (vv. 37-40):

Jesu nungzui mipi zosiate kha, Pathian chawihawi in aw ngai tak in a kiko tau a, Jawlnei Zekariah thupuan kha a guitung tai. Jerusalem khua a lut ua khan a, a nungzuite’n Sam Lâ (Sam 118:26) tawh Jesu kha lopitak ah a vaidawn ua. A puanteu lampi ah a pha piaku kha zia hun lai ah Leng leh lalte chung ah bep in a bawl sek uh a hi. A hawi thei pen leh a lopipen ah Jesu kha ala vaidawn uh a hi.

Chang 39 na khan Pharissai te’n **“Hotupa, la nungzuite**

hi vau ta’n la” atiu ah. Zia tak ahin Pharissai te’n Jesu kha “Lal”, “Messiah” tin a pawm nuam puau ah (a nungzuite’n taklang maleu le); Jesu’n a dawnhuna hi a nungzuite a kikonau kha adik zia i muthei a hi **“...zia mite hi a thip ua leh le, suangchang bêk kikodok ding ahi”** atia. I hinkhuau ah Lal Jesu i vaidawn nuam phatua leh, ei subuai ding, ei susia ding thil ahem mite ahem tamtak um inau, diklo tak ah ei puidawk dingle tamtak um inau (en le mi i pui mang le umthei ina), ahinla Jesu chawihawi ding hi kivatlo a hi, ei i panlo khâk ding hi lau a um zawi. Lunggil kipaktak kawm in i hinkhuau ah vaidawn zaw hitiu.

Tu i gen teu zosia hekawm in, Pathian in damna ei piak hun sung ahin Ama chawihawi in – thuawina tawh, kingaitawmna tawh, ginna tawh, chawihawina’n Lengpa chu vaidawn hitiu.

“JESU THAWKNA CHI THUM”

(Hebraite 6:1-3)

~ Rev. H. Lamthianmuan
i/c Dumlian Pastor Bial

Thuma: Good Friday Ni hi thîldan zat chuam chuam um in ah, himaleh, I Lalpa Jesu damsung pumpi’ thiltung te lak ah thiltung (incident) I thîl chun zia hun hi gingtu zosia â ding ah hun pawimaw pen, thu hiatnawp um pen leh lungthim sukha pen hi ding in ka gingcha a hi. Aziakchu, hingzing pum ah luangdamsa gual mai pû’n, Jesu’n a thisan amal mal ah vâ leh hung vakang ding chu thîlzing pum in a mualliam san na thu hi a hi.

Zia hin nang leh kei kichan leu hin, I hinna thisan hawmdawk tu lungchang (heart) apat I thisan a mal mal ah vatha ah luangkang ding hita leh I thîl ngam na diam? Khatvei mai le hiam leh thal ziak ah thisan-naisan pawt bawn thuak zolo in, Jesu thawkna ziak ah a beliamte apat thisan pawt te I ngainep/ ngaidau ziang sek te’u hi a khawk kasa khawpmai hi.

Bible changtel: I Lalpa Jesu thawkna leh thina apat zillai

ei peding ah ka changtel chu Chanchinpha zik te lak ah a masapen Marka zik bung 15 na hia hi. Zia hin, Jesu thawkna chi thum; taksa sawisakna (Physical torture), lungthim beliam (Emotional trauma) leh Thagau phatsanna (Spiritual agony) nasatak in a thuak ti a kimuthei hi. Zia ni thiltung apat hin, mitin lungthim ei phawngtho leh Gingtu hinkhua ah thil tizat um tepte tâk pawimaw tak chu vak thil khawm hi tiu.

HINNA VÂK

Jesu chu mihing pangai gual a hi: Mihing pangai ei hisak tu chu, taksa, lungthim leh thagau te hi a hi. Taksa chauh in mihing a hithei pua, Thagau chauh, phe leh vo neilo chu mihing a hi diaklo a hi. Chun, Lungthim panglo in mihing pangai tak tak a hitheilo a hi. Mihing pangai diktak leh bukim hina ding in zia cheng pathum a kigawm khawm tei tei ding a hi. PCI Thugin No. V-na chun, “Jesu chu kumtuang chapa mihingtak a hung chang tai atia,” Jesu ngei chu mihing pangai gual in, nat leh sat, lungngai leh kipak thei leh thithei a hi ti ei hil hi.

Jesu thawkna chi thum: Bang gual in Jesu’n a thuak em? I Bible changtel nau a pat in, Jesu’n thawkna chithum in a thuak hi.

1. Taksa Sawisakna (Physical torture): Pontius Pilate in Jesu mawna neilo chu Romte sawisak dan

pangai in sawisang ding in thu a piat. Himaleh, Jesu chu Rom sawlkar dodal ah zalenna sualtute gual in sawisakna sangpen, gawtna nasapen in a sawisa a hi.

Jesu chu mawna neigual in henkol busak in khuam tawh ngawnchang in a kân ua. A vawknau khauhual chu savun ah kiphêk in a mawnglam thik kuika hiamtak ah kivei a hi. A taksa mâmna ding mun umlo in beliam nasatak leh sukdam thei tâklo dingkhawp ah bepawn a siampiak ui. Rom sepai te’n nuizat bawlna’n a mang ua, Lal tiang thasang in molkgang leh Lal lukhuk thasang in ling lukhuk a khuk sak ui. Jerusalem apat Golgotha (Calvary) tang zawtna ding in mile kimkhat ding vel zawt in, a cross gikdan Kg. 75 vel ah gik in dakkal khat leh kim sung ding vel in a zawt tung ham hi. Kraws lêk in kilna thik ah khaikâng in a um ah, hui (oxygen) tasam in a

thuaksak ua, Cheicha'n a nâk vitin tui leh thisan kigawm a luangdawk hi. Zia chu a hi l Lalpa Jesu'n Good Friday ni'n a thuak chu.

Gingtute'n zia ni thiltung (occation) tawh kituak ah l taksa, lungthim leh thagau ah hun matthiam a kûl in a pawimaw tak zet hi. (Etsakna: La chapa thini'n lalawi te'n nunnawp leh gualvakna hun mang ding in hung chial ta leh kua hem l lungngaina vakva ding in sabel zuan ding, kuama kaging chalo a hi). Zia gual ah Lalpa chungnungpen in a thuakdan te hi geldawk thak in hun mangle'u hin chu, nui vul vul nading umlo a hi. Islam sakhua kulmut te'n Jesu chu Kraws lek ah khetden himaleh, a thipuai atiu hi. Tichun gen maleu, Rom sawlkar te sawisakna apat in a phe leh vun kihawk dawk hial ah liam thawkna chu, beliam sukdam kit nading in vang thil haksa tak hiding in gingchak a

um hi.

2. Lungthim beliam (Emotional trauma): Jesu'n lungthim lam ngawlthei na hial beliam a thuak hi. Jerusalem ah puitu te'n Pilate vaihawmna lal chutpha ma in Jesu a dawilona thu leh a nawlna thu uh a puang ui. Hêk theina tincheng in a hêk ua, dân diklo tak in Juda Vaihawmtu te'n chutkhawm hunlo tak in zan lai ah thupukna a siam ui. Kût lak lak ah kût thupipen suakchatna/hukhinna Chiakan kût hun ahin thisan suana ding thu a vaihawm ziang nau ah chun, Dân lam ah zil mi leh mithiam te bawlding in vang a kilawmlo hial a hi. Jesu lungthim ah hung kilang ding ah gingchak umpen chu, Jerusalem temple ah te, Khuatin kikhawpna In (Synagogue) ah te'n Pathian thu lekhazâl te tham in a simpiak sek ah, Gam Chanchinpha ala gensek te hawkha, tuhin bangmalo

HINNA VÂK

gual mai ah a um ziang chu maksa ma ma ding in leh ngawlthei na hial khawp ah lungthim beliam nei ding in gingchak a um hi.

Chuleh, Jerusalem lam zuan ah a chialai in Israel mipite, gamtin apat Jentel mite'n Jesu lamtua na'n, thingsawl te, a puan te'u leh mipi kitiang depdup ten "Lalpa min ah hung chu a vangphai, David chapa kiang ah, Hossana!" tia kipakna kiko thawmgi te hawkha tawh tuhi suammang leh tualthat gual ah hansia lawkhumna, a kikonau thawmgi te chun, a lungthim leh a lungchang sulungngai ma ma ding in gingchak a um hi. Jesu'n lunggil tak ah a hepi ma ma te'n dawilo bawl leh, a nawlna thu te'u apat hin a nam chanpi leh a chipi te apat kidaidan na thuk tak a mu hin, sukdam thei taklo ding beliam nasatak nei ding in ka gingcha a hi.

3. Thagau ah phatsanna nunung (Spiritual agony):

Jesu'n a thawkna ding thu ah dawnding No' chu la'n kisazo ah a umzing lai in, Pathian thu ah Thagau lam ankuang a sawkkhawmpi te, thitiang ah ginum ding ah a kisanpi ma ma te leh Thagau ah hindan a zilsak nungzui 12 te ngei in a kilepsan zan ah khan, Jesu lungthim ah chun gualleh leh liangvai kisa ma ma ding in kangaitua hi. Kraws lek apat chun, thachau, basam leh lungthim ngakna ding kinepna him him muzolo ah khawvel chu thil ngei ding in kaging cha a hi. Sûn kimkhat Dak 12:00 vel ding apat chun, khawvel mite khawlona ziak ah Vâk in Jesu thawkna thuakpi zolo in, khawvel vâk in a nusia tai. Thimzîn na nuai apat in apa a hawl ta'n, "Eloi, Eloi, lema sabakhthani?" apa thupiak zui tu'n a hukdam ding a kinep maizen ding tawh, "Ka Pathian, Ka Pathian, bangatia

ei nusia la hem?" ati ta a hi.

Ahin gitlo ngaidamna ding leh tatna bukim chu I chantheina ding un Pathian thiamchanna Kraws chu a sepmualsua him a ngaita a hi. Ziakiachun, Pa Pathian in le a chapa Jesu thawkna chu mungamlo in, Jesu'n kingakna ding hial neilo gual in Pathian Thagau inle lunghei san in a phatsan ta a hi. Lungakna ding neilo, panpitu ding muzolo, thamuantu ding umlo leh kinepna ding him him umtalo nung in, Jesu'n vanlam a en ah, ngaitak in a kiko ah, a thagau a thâ tai. Zia chu Jesu'n a thi masang ah bawlsawm tak leh liangvai tak ah a thawkna, Thagau ah phatsanna nunung a thawk chu a hi. Gingtu nang leh kei kichan leu hin, Jesu thil channa apat I kamsuak ding ua ka ngaituana um chu, Ka Pathian nanghial in ei nusia la hi maw? Kiti maithei a hi.

Thutawp: Good Friday ni

thiltung hi thil kipak um lamsang in, thil dâum tak hun a hi. Zia ni hi Khawvel zosia â ding in, I Lalpa Jesu'n Pa Pathian ma'ang ah I thiamchan (Justified) theina ding ah Pathian lungnatna (Wrath) No' chu la'n, thawkna chitin thuak ah Pathian thutiam peIngailo zia ah gitlona hansia chu pû'n a Pa vaihawmna dik (Justice), thutanna pha (Judgement) leh bukim (Perfect) chu pekim vek in a Pa a chawisang zawta a hi.

Ziakiachun, gingtu (Khristian) te â ding bik in Good Friday (Jesu thini) ni hi manpiak ah chawkna thisan man lultak chu, ditkit zolo maleu hin le, zi ni hi hun pawimaw tak, hun mantam tak, hun lûltak leh hun zek a hi zia in, a mang/nit/chang ding tute zosia'n simna diktak tawh ginna hing pum in hun mangchiat hitiu. Lalpa'n a thu malsawm ta hen.

“THINA DO ZOIN A THO KIT TAI”

(Matthai .16:13-21 ; Marka 16:1-6)

~ Rev. Th. Samuel Vaiphei
i/c Phaipheng Pastor Bial

Thumapui : Pathian malsawmna chang kit in Lal Jesu thawkitna ni pha i tung kit taua. Lalpa'n Lopina chang hen la. Tuni hin Pathian nasep lak ah lopipen thu hih vak thil nawn thak kit leu hin dawi-um a hi. Khawvel ah thil tung lak ah lamdang leh lopipen in i ngai diam uh aw? Khawvel in thilmak leh lamdang pasagi (7) lak ah vâng a pang zolo a hi. Ahin gingtute â ding ah chun thina do zo in thawkitna khêl ah thil lopi leh lamdang umlo a hi tihh i ngaitua thak uh pawimaw a hi.

A Umzia:

Lal Jesu hunlai a chun, mithikhua chungchang ngaidan ah Grikte ngaidan hi mi'n a hiat leh gen tam pen uh a hi. Grikte chun, mithi khua chu kul lopitak, khawtkhak pakhat bep nei a hia, khat vei i lut tâk chun pawt kit thei taklo a hi. Kawt bul a chun, mithi Lengpa, Pluto (Grikte Pathian khat) chu a mai in a ngak zing hi. Khawtkhak hung

kiu a hung tapo chu kawt hawng in tai leh phal tak in a lutsak sek hi. Ahinla, kuama kile kit leh pawt kit phal a hi puai. Mihiamte ngaidan a chun khat vei i thi tâk chun hing kit thei talo, kumtuang ah mangthai ti a hi. Zia chu tulai inle i ngaidan uh a hi. Gingtu Khristian dan pawmtu i hina zâl un hun nunung ziltilna ziak in thawkitna thu i hiau a, ahin i gingcha tak taklo uh a hi ti

thei a hi. Khawvel ah i kikhual dante'u leh thi leh manna thu i ngai pawimaw dante'u a pat hin hiat thei a hi.

Lal Jesu chun khawvel ngaidan hih a he zing a, thina zo in a thawkit ahin khawvel mithikhua kul khawtkhak lutna chu hawng den in thina apat chun hinna thak i chang kit thei tau a hi. Zia chu Lal Jesu'n a damlai inle a nungzuite kiang ah ala gen zing ahia, ahinla, ala gingcha puau hi. Tuhi le ama din kochuamte'n le a gingcha puau hi. Lal Jesu chun chu zia mithi khawtkhak chu ka zo ta a hi ati a hi.

Thawkitna a pat malsawmna Lal Jesu thawkitna ah chun hinna ei pia a hi : Bang a hem hinna chu? Khawvel i damsung ua hinna hih a hi diam? Ahiloleh thi talo ding hinna a hi diam? 2 Kor. 5:17 na achun *“Kuale Khrista ah a um*

chun thilsiam thak a hung hi tai; thil lui chu a hung bei ta'n, en tiam un, thil zosia a hung thak tai.” ati a hi. Khawvel hinna leh thil zosia bei in tin, a thak ah thil zosia siamthak ah um ding tina a hi.

Zalenna ei pia a hi :

Thina lau ziak ah damsung suak ah umna pat hukdaw i hiu. Galatia 5:1 na achun, *“Suak hilo ding in Khrista chun ei tandawk tai; ziazia kachun, dingdet unla, suak ngawngkaw l in tang kit ta kiu in.”* Thina suangkul apat suachakna neite i hiu ti i kihiat uh a pawimaw hi.

Thawkitna ziak in Kochuam din thei ah um a hi :

Ziazia kachun, chanchinpha chu gamtin ah thezâk in a um a hi. Lal Jesu Khrista Lalna gam a khang zel ta hi. Chanchinpha chu chia jel ding a hi. Tuni nang leh kei in i chan hi i

HINNA VÂK

etkawl phatlo chun ei nusia in tin, mundang ah chia jel mai ding a hi. Zia chu Pathian thupiak a hi. Mathai 24:14 na achun, *“Chuleh, zia gam chanchinpha hi nam zosia hiatsakna ding in khawvel zosia ah genjak in um intin; ziazaw chu leh, tawpna chu hung tung in a.”*

Thawkitna hih thilhitheina a hi :

Gingtute â ding in hatna leh thilhitheina ah thuam a hung hi tau hi. Zia thilhitheina apat chun vangam tiang ei tuttu a hi. Kolossa. 1:11 na chun, *“Kipak tak ah bangkim thuakhat tak ah la umtheina ding un, a thilhitheina nasa tak ah kipat hung pawtdawk chun, bangkim in hung suhat hen la.”*

Thawkitna ziak a chun thi thamuanna i nei tau a hi :

Pathian Thagau umpina ziak a chun, vangam kumtuang dai chenna mun ding chu ei hiatsak ta hi. Zia kinepna lopi tak chun thamuanna ei pia a hi. Phillipi 4:13 na chun, *“Ei hi’hatpa Khrista jal ah chun bangkim bawl thei ka hi.”*

I thagau hinkhua ah bulpi pen Jesu Khrista chu thina zo in a thokit a, zia ban ah chun, a mite kiang ah hing ah kilak in, a kimusak kit sak sek hi. Zia gual ma ah chun, nang leh kei kiangin a kilâk zing a hi ti i hiat uh pawimaw a hi. Lal Jesu thawkitna thu hi thuanthu I ngaithak gual ua hiat ah kawi mai ding a hi puai ti i hiat uh a pawimaw takzet hi. Tulai gingtute hinkhua ahin ei kimusak sek em? I mû in i hinpi thei nau em?

LAPAWL AH LAL NASEP

~ P/P S. Lunmuanthang

Thumapui: Khawvel huap ah kochuam tam zawte hin Music leh Lâ ah Pathian nasepna hi nasatak in ala chiapi zing ua, zia lak a chun ei u kochuam hile Lâ ah Pathian nasepna ngai pawimaw ma ma te lak a khat ihu hi. Tu khang vang ahin i ngai pawimaw ui ti chu gen ngai kêilo in hiat leh muthei ziang a hi tai. Tuni hin hiatchian diak a nawp um ah, ziagual nasepna hi, Banggual ah hung kipan? Bang a h'em a tup? Ti leh i Kochuam ah bang tiang in i ngai pawimaw em? tite ala genkhawm hitiu.

1. Thuthunglui ah:

Thuthunglui hun ahin Lapawl mêl kichiantak leh a dinmun kichian tak hiatchian thei ala hitai. Thuthunglui ah Lapawl ah Lal nasepna i hiatchian theina ding un zia hun lai lapawl sa te dinmun hiatchian masak a ngai hi. Zia hun lai ahin Tumgit leh lapawl hin Israel te hinkhua ahin panmun pawimaw tak ala nei ta, a thiam leh mawpaw ding bîk le ala um ta hi in i Bible un ei hil hi. Israel te leh Pathian kikâl ah panmun pawimaw tak a lua hi. A nam leh gam un Pathian kiang ah kipakthu genna dingte, leh Pathian a lak ua a chen theina ding in tumgit leh lapawl te hi matchak ala hisek

hi (2Kh 5:13). Pâkna labu Sam bik ahin kipakthu genna lâ hi a kimu tam ma ma hi, Pathian in umpi ding ah chialna le bangzat a h'em tak muthei in a um hi. Tu hun gual ah Kochuam kituptak din a hi nailo ziak in leh Biakin kituptak sak a um nailo ziak in a kilat dan hi ngaitua thiam a pawimaw ma ma hi. Joshua hun lai ah Jeriko kulbang a chipna ding a khan lapawl ah Pathian nasepna kichian tak a kilang hi. Jehosaphat hun lai a khan lapawl ah Pathian nasepna lopitak tak muthei a hi (2 Kh 20:5-22). Moab, Ammonte leh Meun te pangkhawm in Jehosaphat do a guat lai ua a galzawnau kha Levi suante lak

HINNA VÂK

ah Kohath leh Korah chate chu Israel te Pathian chawihawi ah aw ngai theipen asua ui, zia tak ah Pathian chawihawi nau Lâ a Pathian nâ a sepnau hin zawna a piyai.

2. Thuthungthak ah:

Thuthungthak hun ahin Lapawl hin dinmun Pawimaw tak a lua kit hi thuthungthak hawanna leh khakna ti thei hial a hi. Lal Jesu pian ah vansawlchakte'n belampute kiang ah Jesu pian thu ava hil ua khan Van mite'n lapawl asau (Lk 2:14) ti thu a kimu'i. Thupuan 14:3 na achun Belamno leh mi nuaikhat singli leh sangli te'n lapawl sa ah Pathian a chawihawi thu'u a kimu kit hi. Thuthung thak bu hin a thiltup lian tak pakhat chu Lapawl ah Pathian chawihawi a h'em Pathian nasep hi a hi ti kichian tak in a muthei hi.

Lal Jesu pian akhan vanangelte'n mawpuakna kha Belampute kiang ah Jesu pian thu hiatsak kha ahia, Van mipite nasep pipen chu Lapawl sak ah Pathian chawihawi leh Lal nasep kha a hi. Thuthunglui leh Thuthungthak ahin Lapawl

ah Pathian nasepna pawimaw tak takte i muthei ua a leng in vang a zia u a kibang khel puai, ahinla a leng ahin Lal nasepna a hi vek hi. Bible laimugil chu Pathian hepina thu a hi gual ahin zia hepina thu hi Lâ tawh kikhen theilo a hi zia a kimu langsal ma ma hi.

3. Kochuam masate:

Fr. Anasius Fahmy in a lekhabu zik "Kochuam pate chanchin" ti lekhabu a zikna chun Lapawl ah Pathian nasepna hin mun pawimaw tak a lua dan ziagual ahin a tâklang hi. Pathian biakna kikhawp hun in Thugen a pawimaw pen ah kawi a hi gual in Lapawl lâ hin kikhawpna ah mun pawimaw tak a chan zia a taklang hi. Zia khêl lam achun gingtute mat ah aum ua sawisak leh sukgenthei ah aum taku leh Pauchap leh lasak in Pathian nâ a sêm sek ui. Zia umzia chu, mat leh sukgenthei ah umte nêmtu in a pang seku a hi. Ziagual ah a bawl sekteu zia a chun gingu sawisak leh sukgenthei ah umte chun hansanna leh lungmuanna a nei khawlaw sek ui.

4. Tulai Kochuam ah:

Khawvel changkang to zel a hi ziakin, mite lungthim ahin Pathian nasepna ti thumal a git leh bang kawng a hi em ti thei i hi tau. Hun chiatasa kum 15 masang lam kha thîl leu hin, zia hun lai ah Pathian nasepna i hiatdan uh leh tuhun ah i hiatthiam danu hi a kibatlona tamtak um ta ding in a ginchak um hi. I hun chiasateu a khan Lapawl mangcha Pathian nasepna hi hethiam huntawk leh pawimaw tawk gual in gêl maleu hin, mun pawimaw pe zolo deu gual in ila um ua, ngainepna khat nei hileu hin a kilawm hi. Ahin tu hun tiang leh kum 10 chiata tuam apat Lapawl ah Pathian nasepna ti hi i hiatthiam danu a hung chuam tai. Pathian nasepna bâk pawimaw tak leh kochuamte'n mun laimugil leh pawimaw tak i lua sak tau ti a kichian ma ma hi. Lapawl ah Pathian nasepna ti hin thu ah Pathian nasepna gual tho in Pathian kona dawn hi a ngai tho hi. A bîk in tu ah i chiapi dan ua hin Lapawl ah Pathian nasepna hi hunbi term nei gual in i chiapiu a, kum 2

vel a hi tangpi hi, zia hun sung ahin thei tawp ah kisakkhawl a pawimaw hi. I kochuam bîk in tu tiang ah Lapawl ah Pathian nasepna i nei danu hi chini in khen thei hina, zia chu Tangphai Synod sung leh ei Synod pawlam ah nasepna in.

4.1. Ei u Synod sung bik ah:

Tualsung kochuam apat in Synod tiang ahin a tamzawte'n lasapawl kitup tak te i nei thei suak phial tau a, zia hin Pathian nasepna i ngaikhawk danu hi a kilang thei hi. Tualsung kochuam bîk in Kochuam lapawl i kineppinau a sang ah, a hatzawk diakna ding ah i malâk danteu le a pha ma ma tai, ziagual ma chun Bial tin in Bial lapawl nei kim thei gual in i um tau hi. Mun tamtak a chun milip in Pathian nâ i va sep theilona munteu in i Bial Lapawl teu in eiuh sep thasik a va sêm theiu a hi. Bial in le a pawimaw zia hia in Bial Lapawl etkawl na ding in Budget kilawm hun tawk tak tak i kawi piak sek tau a hi. Budget khêl lam hial in le a pawimaw chun bial in mâ ala sek hi.

HINNA VÂK

Ziate hi thîl in Kochuamte hin Lapawl ah Pathian nasepna hi i ngaikhawk mamau ti a kilang hi.

I Synod bîk in Lapawl a ngaikhawk dan hi i hiat ngeiu a pawimaw hi, Synod huap a Lapawl ah Lal nasepna hâttak a chiapi in masang a khan Manipur Area Choir (M.A.C) ti minvua in kum 10 val hial ala chiapi tai. Synod programme zosia ah pêllo in Pathian chawihawina lâ in Pathian nâ ala sem in Kochuam mite Lâ mang in a thagau hinkhuau ala chawm seku a hi. Tuhin Pathian mapuina zâl in Synod Choir ti in i he thei tau hi.

4.2. Synod Pawlam ah nasepna: Pathian mapuina zâl in tu tiang ahin a nâ semte Pathian in chawisang to zel in, Tangphai Synod sung bep hilo in P.C.I programme te tiang in nam dangte lak in Pathian nasepna i chiapi thei tau a, zia ding ah a nasemtu muan um ah ei guat ah namdang lak leh paudang lakah le a chanchinpha puangzaktu i hi khawlaw thei tau. I chenna

gamu leh Synod sung bep hilo in gam pawlam leh Synod pawlam tiang in Lal nasepna'n i mang thei tau hi.

Thukhakna: Lapawl ah Lal nasepna hi a hun leh a mun zil in a mellat dan kibanglo deu gual ah a um khakna le a um hi. Ahinla a thiltuppen leh a laimugilpen chu Lal nasepna hi a hi. Thuthunglui a chun Pathian thupiak in Galdona'n a mat hunu hi a tamzaw phial ah muthei a hi. Thuthungthak a chun Lal Jesu khawvel ah ahung pianna puandawna'n a mang kit ui. Kochuam masate khan ahileh Biakin ah mun pawimaw tak a lua sak ban un, sukgenthei leh nawchêp ah a um hun bîk taku leh Lal nâ a sep theipenu hi in a ngai kitu a hi. Tu khang a Kochuamte hin i hiat danu leh i mat danu hi masang sâng a khan huaplitan zaw hileh a kilawm tai. Martin Luther chun *“thu ah Pathian nasepna hin mun sângpen a lua ah, zia khêl a chun Lâ ah Pathian nasepna khêl ah lopi a umpuai”* ala ti hial hi.

DANGKA SUM NGAINATNA

(Matthai .16:13-21 ; Marka 16:1-6)

~ Upa S. Thonglam, Hill-Town

“Dangka sum ngainat hi gitlona chitin bul a hingal a; khenkhat in hausak nawpna ziak in ginna chu jamsan in, amau leh amau lungngaina tamtak a kisunkhum sek uh a hi.”

Satan in gingtute, Pathian mite suksiatna ding ah matchak tampi a mat sekte lak ah chun numei leh sum hi a lawtinna pen a hi. Tulai in I gam ahin dangka sum ngainatna a uang ma ma ziang ah, sumdawn dan le a sang hi. Nidanglai ah I hiatkhak beklo ‘Crore’ ti lam ngawn ah sumdawnna a hung suak tai. Van man a tam deu deu a, nisin ah thagum ah kilaw kawmte leh sum muna mumal neilote leh thudik ah sum hawlte â ding in lungkham hung um ma ma ding in a kilang hi. (Mat. 6:31-34 sim in)

Ziagual dinmun haksatak ah I khawsak zing lai un sum ngainatna thâng ah satan in ei awksak khaklo na ding in gingtute hi pilvan ngai ma ma ding a hi. Gingtu tamtak le zia satan thâng ah ala awk ta le I um maithei u’i.

Bible ah chun zia sum ngainat thâng ah awk ah, a hinnau natiang chên khawlaw bangzat ahem imu, ziate haw chu,

1. Akan (Joshua 7:1-26) :

Joshua malatna Israel te’n Jeriko khawpi a bulu lai ua gallâk thil Pathian in laklo ding ah thupiak a bawl chu Akan in Babulon gam puan hawitak, dangka shekel 200 leh sanatum shekel 502 gik chu a mu in a enla ma ma ta, Pathian thupiak chu za talo in a la ta mai a. A zi, a chate leh a nei zosia tawh Israel mipite’n suang in a sep lum ua, mei in a hal tum u’i.

HINNA VÂK

2. Gehazi (Elisha Suakpa, II Lengte 5:22-27) :

Gehazi chun zuau gen in a pu Elisha sawl gual ah gen in Naaman kiang in dangka talent ni leh kithenna puan pani a lak ziak in Naaman phâkna chu ama leh a suante chung in kumkhuan a um hi.

3. Juda Iskariot (Mat. 26:14, 27:3-5) :

Juda Iskariot chun dangka 30 etlana ziak in Jesu matsaktu in a pang ah, a khawnung in thil hikhial kisân a kisik ah, ama leh ama a ki-awklum hi.

4. Anania leh Saphira (Nas 5:1-11) :

Anania chun a gam a zuak ah, a zi Saphira tawh kithugual in a gam zawkna man uh a khen a îm ua, Apostolte them in a bawn ah Apostolte gen hi'n a kigen ua, a nupan un a thi khawlaw tau hi. Peter chun mihing them la hi puau ah, Pathian them la hui a ti a hi.

Tulai ah i gam ua sumlaklut dan I mit in I mu chet pawna, Local News te haw ah I mu

dan ah chun a kimandawklo tamtakte lak ah security te'n a matdaw te haw lak ah chun ei thingtangmi min le a hung chuang sek hi. Gingtu (Christian) kiti hi ngei ding un a ginchak um hi. Mudan diklo ah sum laklut hi Bible in a dem ma ma hi. Zia anuai ah gual hin -

“Bailam taka hausakna kilakhawmte chu bailam tak in kiamtha kit intin, thagim tak ah neucha cha lakhawmtu vang chu pung ina.” (Thupilte 13:11)

“Nunsia tak ah go khawlkhawm chu lawkna a umpuai.” (Thupilte 10:2)

“Kin leh mawl ah go kikhawlkhawm haw hi, a tawp lam leh a lamzang ngaipuai.” (Thupilte 20:21)

“Hausak pai gawte chu gawtlo in suakcha puan au.” (Tupilte 28:20)

Ginglotute haw chu a hi di mawng in kawî talehin, ei gingtute haw hin bang ziak ah Pathian launa neilo ah a thu

(Bible thu) te haw hi bangma ngai talo I hi diam?

Thugentu 8:11 a chun, “Thil gilo bawlte chung ah gawtna piak pai pai a hiseklo ziak in mihing chate haw lungthim chu gitlo bawl ding in a hangsan sek ui.” Atia. Pathian zangaina, dawtheina hi I mangkhial zo tau hi. Pathian chun thil gilo bawltute chung a chun zai daw zinglo ding a hi.

Thu kizik khat a chun - “God is slow but always in time” Pathian lungnatna ngak daw khak ding chu thil lau um tak a hi (Heb. 10:31).

Tulai ah eimau gam ah sum laklutna kinei minthang ma ma chu ‘Kani’ a hia. Government in suk mangthai di gua’n nasatak in pan a la zing hi. Zia hi ei thingtang mite haw hin iha bawl ua. Khristian vek ah kigen ihiu ah. Gitlona, dan bawtsiatna ngailo ihi diam uh?

Mi holimna khat ka hetna chun, khua pakhat a chun ‘Kani’ lei a bawl uleh midangte

a chu a hawi ah hawilo, a khuau ah a Kochuam Upa pau kani chu a hawi ah hawi ziang. Zechu a muphat un a khaw mite haw chun, “bangcheng I gen na chu, Pathian he deu te hin chu malzawl na vang a dawng deu ui” a tiu hi. Ahung holim khawm kit ua, ‘kani’ man ah sum kimute hi sawm ah khat piak ding ahi diam maw” a ki tiu hi. Bangtin la ngai em? “Pathian leh sum na semkawp thei pua’n lau” ti hi ngaitua thak hitiu. (Matt. 6:24 ; Lk. 16:13)

“Ahin, nang Pathian mi, zia thilte chu jamsan inla, diktatnate, Pathian ngaisaknate, ginnate, hepinate, thawktheinate, nunnemnate, ziate chu delzaw ta’n. Ginna kidona pha chu do inla, kumtuang hinna chu tudet in.”

Lalpa’n sum ngainatna thang ah awklo ding in ei veng chiat ta hen lah, a thu I zikte hi mal ei zawl piak ta hen.

PATHIAN GALVAN BUKIM IN KIVAN UN (Ephesa 6:11)

Upa Luaikhomang, Thingkeu

Pathian in i mateu ei pui zel in, tukum 2023 March tha tiangte ei pui tung kit ah, kipak a um ah, Khawmpi nu leh pa te'n sermon (article) ziaak ding ah ei hung guat uh hi kipak um ka sa mama ah, langkhatlam ah ngaitua in kisanla um ka sa. I ma lam ah hung tung pai ta ding April tha ah Bial Kikhawmpi Munpi Pastor Bial Kikhawmpi thupi ding in '**Pathian galvan bukim in kivan un**' ti hi ngaituana liantak nei zing kawm in, Pathian galthuam bukim ti hi thupi mang in thei dan dan in vak gen hitiu.

Pathian galthuam chu bang bang a hi em?

Pathian galthuam hi a leng in sulang zopua hi tin, a pawimaw deu deu vaksulang hi tiu. Pathian galthuam chu thunuaigawlnate, kingaitawmnate, thutaknate, ginumnate hi gingtute â ding ahin meithal, meichang a ngai pua, ginumna diktatna, thutaknate hi gingtute a ding ah galvan pawimaw pen a hi. Pu R. Thanghuta in a lâ phuakna chun ka galthuampha ka kawm ngam puai aw ka chenna gal mun ahih. Nisin gitlona'n ei them sek hi ka hukdampa helo dingin ti'n ala phuak hi. Nisin ah gitlona gal tawh kido zing i hui ah khawitak mun in um len le galmuanna a um puai. Zia ziaak chun, ding un la, la kawng uh chu thutak in gâk

un la, diktatna awmphaw chun kithuam un (Eph. 6:14). Zia zosia hi tawh ginna awmphaw chu la un lah, zia chun migilo thal kuang thei chu sumit thei in lau, (Eph. 6:16) ah i mu'ua hi. Zia ziaak chun ginna mihangsante chanchin saulo in vak sulang hi tiu.

Danial chanchin pansan in vak gen hitiu. Lengpa Nebukkadnezer chun lal In ah hotu ding chu lal inkuan leh milian inkuan ah kipat hun pui in Israel tangval melpha leh pian bukim, pilna lam zosia ah thiam, hiat thiamna leh lungthim pil lengpa Inpi ah nasem thei ding bang zat a h'em a hung tel dawak ah. Kaldaite lekha leh pau zilsak ding in thu a pia, Lengpa chun lal inkuan ah mite nek leh dawn

tawh kibang in nisin leh a chan ding uh le a guat chuam piak a, a mau chun, kum thum a zilzaw phatu leh lengpa vaihawmna pansak ding ahiu a, ziate lak ah chun Juda phung ah kipat in mi pali a hiu a, Danial min bep hi vak sulang hi tiu. A min teu zosia hi le a phuak thak piak chiat uh a hi. Himaleh Danial chun, lengpa nek leh dawn ah kisuk buaklo ding a tup tinten ah, tichun lal in ah hotupa kiang in kisubuaklo ding in a dawn tan, tichun Pathian in danial chu Lal in hotupa dawisakna leh lainatna a neisak tai (Danial 1:9). Danial hi Pathian galthuam bukim in a kithuam ah, melmate âng ah le tawm ngai lo a hi. A ginna leh a diktatna hi ettawntak ma ma a hi. Nisin in hêk in a um ua, galthuam bukim tak in a kithuam zing uh a hi. Zia ziak chun lengpa nek leh dawnte ah kisu buailo ding a tup tinten hin le gal zotu khat a hina a sulang ma ma hi.

A ban in lengpa Nebukkadnezer hin milim liantak mai a siam ah a san dan tawng sawmguk, a vailam tawng guk in a siam a, zia chu Babulon gam sung in dura phazawl in a kawi ah, lengpa chun gam sung ah gam bung tin apat te kithua

in, thu dawt mite, sum kawlte, thutan te leh vaihawmte leh gamsung ah milian milal zosia chu a milim siam tundaw latna pang chiat ding ah ko khawm ding in mi a sawl a, tichun mi zosia chu lengpa milim siam chu ho ding in pengkul gite, lilute, tingtangte leh gawsemte leh thilgithei a hiat phat uh leh mitin te, namtin te chun lengpa milim siam ma ang ah chun a bawkhup chiat tau ah, zia hun a hin le Danial leh a lawite hi milian ang ah le bawkkhup ngai lo a hiu. Pathian galthuam bukim in a kivan zing ui. Zia chun lengpa kiang ah hêk in a um kit ua, leng Nebukkadnezer hin le dawtna a siam ah Danial leh a lawite hi ka milim siam ka pathian na la sem nuam puau a tiu hi a dik em ti'n a dawng ah. Danial leh a lawite'n le a dawnhu'u ah, aw lengpa Nebukkadnezer zia thu ahin la ang ah ka kilep uh a ngai puai. Aw lengpa, a na ka sep piak uh Pathian chun meipi kuang lak leh nangma khut ah kipat ei hukdawk thei a hi chun ei hukdawk mai hen, a hu ti taklo leh le aw lengpa la milim siam chu le ho diaklo ding ka hiu, ti'n a dawnhu tau a hi. Danial leh a lawite hi a ginumna teu leh a thutakna teu

HINNA VÂK

hin lengpa Nebukkadnezer hi a zo mama ui ti hi kichian tak in i muthei u'i. Danial leh a lawite hi meipi nasatak lak in selut in um ma leu a sam uh zang khat le kângtanlo a hi. Hangsan tak in lengpa lungnatna mai thim tak mai le laulo in Pathian galthuam bukim in a kithuam zing u'i. Zia ziak chun lengpa Nebukkadnezer in thupuan a bawl ta a hi. Pathian chu pakin um ta hen, a van sawlchakte hun sawl ta in, a ma muang ah a nasemte lengpa thupiak le zalo ah a Pathian uh tilo pathian dang nasep leh ho sang ah taksau pe dawk ngam zote chu mei lak ah kipat in a hukdawk tangal ah. Ziakiak chun thupiak ka bawl tai, mitin namtin, pautin lak apat in danial leh a lawite Pathian gensiat ah, thugen taphawt chu sat tel in um uh henla, a in uh le suksiak ding a hi. zia gual ah hukdawk thei Pathian dang him him a um paw ngal in, ti'n leng Nebukkanezer hin thupuan a bawl hi ti kichian tak i mu'u. Galzotu Pathian chu lopina chang ta hen.

Awle, gingtute hi nisin ah gitlona galdo i hi zing lai un, i chenna gam Manipur hi milim hote thu neina leh vaihawmna

nuai ah um zing i hiu a, ei uh Khristiante â dinga hin haksatna tamtak ei tun sak thei a hi zing lai ua hin thingnuaimi vaihawmna nuai ah um le i hi zing ua. Tekhinna dingin; nitak in nuam tak ah i lenkhawm dup dup lai un thingnuaimite bang hin la lengkhawp nau hi kin tak in hai un ei hun tiu hen lang la hailo ua leh thuak ding la hiu ti in nasa tak in vauna bang ei hung bawl uh hen lang meithal tawh, mawl tawh kochuam puitute bang hih ei hung hawl vut vut mai ta leu chu Danial te gual ahin pan i la ngam tak tak na diam uh? zia hun lai tak ahin, Pathian gal thuam bukim ah kivan i um chun i sukkhial i bawl khial le umlo a hi ziak in hangsan tak ah i pan uh hi a pawimaw ma ma a hi. Pathian in i genthei thawk ding a phal a hi. Zia ziak chun Pathian galthuam bukim ah kivan a, suk gentheina tam tak thuak in Pathian gam i lut ding him uh a hi ti hi kichian taka i mu a hi (Nasepte 14:22). Zia ziak chun, gitlo thina thim ah kimang zosia te tho kit hi tiu in Pathian galthuam bukim ah kithuam ding in simtu zosia Pathian in hun mawlsawm ta hen. Amen.

“IMU LAITHAW HAL AHUN TAI.”

(Romte 13: 11 – 12)

Pi Lamneikim, Nazareth Kochuam

Amasa’n Hinna Vâk mangcha a thutak puang dinga hun pha
Ei petu Pathian chung leh Hotute chungin kipak thu kagen
masai.

Awleh, ei uh gingtute hi Lalpa’n sepai gual ah ei genna tam tak
imû ah. Gingtu zosia, zia khawvel damsung hun i mat zing lai
un, kidona mun ah um gual ihu ti gelchian thak kit hitiu.

Sepai gal vengtu chun a gâlvênna mun, duty a puak
lai in imut san mai leh bang
gual in a khawk ta diam? Ama
hinna leh a lawite hinna â
ding tiang in lauthawng um
ding a hi. Zia gual chun eih
gingtute le Lalpa hungkitna
ding ngak ah i um lai un,
imut san mai ah ngak i hi
khak dinguh alau um ma ma
hi. A vaigei masangin i
dinmun teu, eima insung,
khawsung leh kochuam
sung ki-enchian thak kit
hitiu.

Eima mai hilo in, i kîm i
kianga umte le, phawt
hal ngaite phawng hal
dingin kipan thak kit
hitiu. Muang tak ah ala
imu tate - Nu leh pa, zi leh

cha, suapi u leh nau, insak
inthang, Lalpa dawn di’n
kai tho hitiu, a hungna
ding lah a nai ta ngal ah.
Zân hila a bei vang vang
tai ti i he ngal un. Hun
um dante i et ahi chun,
Lalpa Pathian hung kit
ding thu, a thutiam te :-
Linling, kido thuthang,
nisi’n in a tung zung
zung mai ta ngal in.
Mihing siatna a pung
deu deu ti le hin le gen
khial puai tiu. Maleh,
mihing lungthim hi tâk
sak in a um deu deu ta
ngal in.

Luka 21:34-36 ah i mu gual un:

34. La lungthim teu chu
nek papna leh zu duna
leh zia khawvel dam
sung ngaitua

HINNA VÂK

nate ah la kisak buai laitak ua, a hung tung phut ziang lona dingin kiging zing in um un.

35. Lei chung a chengte zosia chung ahin, thâng ah awk gualin hung tung phut ding a hi ngal ah.

36. Ki ging zing in um un la, zia haw zosia chu la pumpêl ua mihing chapa ang ah la din theina dingun pauchap zingun.

Ti i Bible zik ah i mu ngal un, gingtu kitite hin zia gual hun, hung tung phut ziang ding chu pumpêl thei ding leh kiman sa in i um nau em ti hi, eima kietchian thak kit hi a kûl in a pawimaw takzet hilo a h'em?

Bangti'n la kingaitua sek em? La tha a muang tak tak na diam? Ahilo leh midang dinmun te in la buai mai sek em? Bang cheng sang in nang leh kei a hi Lalpa'n pawimaw a sak chu. Pawlam lat dan in fel in i um mai thei, kham thei leh nêkgûk, khut thianglo ah

sum leh pai lâk khawmna lam ah thiangtho i hi maithei hi. Maleh, Lalpa'n sunggil lam a en sek hi ti i hia ngal un.

Chun, zia khawvel damsung khawsakna ding leh thil dang dang ngaitua ah, hun i mat zing lai un, Lalpa Pathian chu hung phut ziang taleh, lungawi tak leh kipak tak in Pathian ngakte lak in i pang na diam uh?

Aw, unau, mualphona'n ei huamlona di'n pilvang takin, ngai chang zing kawm ah a hungkitna ding ngâkla tak ah ngâktu hithei din kisazosa'n um chiat leu hin i kidawisak khawp mai hi.

I Bible ah i mu gual un, îmu i hi laitak ah, a huam khak ding mi tam ding a hi ngal in. Zia mi tamtak kiging manlo/kisazo manlo te lak ah i panlona ding un, simtu zosiate, Lalpa hungkit ni ah ama dâwn ding ah kisazosa ngak thei chiat ding in a thutak Lalpa'n ei malsawm piak ta hen.

HIAT NGAILO HIATSAK TU LALPA PATHIAN

*A Phuaktu : Upa Kaikhokam Vaiphei,
Compound Veng*

Amasapen in zia a chung ah thupi “Lâ leh a tuanthu” ti Amangcha Tangphai Presbyterian Church a ding ah i organ uh pawimaw tak mai Hinna Vak Editorial Board in article zik ding ah ei guat uh hi kipak um ka sa mama hi.

Thei kham kham ah lâ kibawl te hi i Bible Thiangtho pansan ngen in bawl a hi. Zia a nuai ah lâ panga (5) te hi a hung piandaw dan tawh ka hun zik mai a hi.

- 1) Malzawl na nâk Lal Jesu leh Dam na bukim Jesu a hi
- 2) Hiat ngailo hiatsak tu Lalpa Pathian
- 3) Bit na Lalpa Pathian
- 4) Kochuam Pathian taksa
- 5) Liangvai te Lalpa

Pathian panpina zal in 2017 apat tuni tiang in Lalpa'n lâ Covid-19 pandemic zia ah lockdown sung kum khat Pune ka um lai ah ei piak lâ 18 tawh kigawm in ei piak zosia chu 98 a hi tai. Video album pakhat “Bukim na Lalpa” ti min put sak in Jubilee Kochuam Lapawl te'n lâ pasawm (10) Music Video Album ah bawl in date 21/12/2018 ni in Bialtu Pastor Rev. Joseph Lalnunmawia in release leh latna Jubilee Church Centenary Hall ah ei bawl piak hi. Zia lâ te chu YouTube ah le et thei ding ah kawi a hi.

A dang dang a hi leh KKP Bial chuam chuam te'n Official Music Video Album ah pang dingin “Kulpi det ka Lalpa”- Lamka Pastor Bial Choir leh “Damsung hun hi”- Imphal Pastor Bial Choir in a bawl tau ah, YouTube ah et thei ding ah kawi a hi.

1) “MALZAWLNA NÂK LAL JESU” leh “DAMNA BUKIM JESU A

HINNA VÂK

HI” :

Kum 2017, June 4th hi Presbyterian kochuam (PCI) a ding in Health Sunday ti ah sunnung kikhawp leh nitak kikhawpna zia thupi nei ah mat zing sek ala hi. Zia kum ahin zan kikhawpna 6:30pm ahin Jubilee Tualsung Committee in nitak thupi “Damna bukim Jesu a hi” ti mangchan thupi gen ding in guat in ka um hi.

Zia thupi mangcha ah gen ding Bible te thupi kipia chanchinpha Matthai in a zik bung 15 na ka sim lai in taksa damna ei pia, zia khel lam ah chun thagau damna ei piak hi Lalpa apat malzawlina thupi dan ka ngaituana’n a hung kilang masa zaw daih hi.

A thilthawnpiak sim senlou leh a hepina lamdang sim senlou hin ka ngaituana a lua dim ta, Lalpa’n ama chawisangte hi a chawisang ah, Lalpa’n a thatham ngaipuai ti mangcha in Lalpa’n zia chawihawina lâ a thu leh a kai (tune) le ei pe ngal a, Lalpa chu pak in um ta hen.

Zia pakna laa hi Pathian in ei piak tawh kitawn in Lalpa’n

ei piak ka sermon ding tawh “Damna Bukim Jesu” ti lâ hi le dated 7th May, 2017 zingkal lam 2:00 am in a lâ thu tawh a kai (tune) hi le ei piak khawm ngal a hi.

Zia lâ te hi lamdang tak in a um ngai lo thil ahia, ka kipak bêk zia in Dated 11th June, 2017 Pathian Biakna kikhawp pel in Jubilee Khristian Khanglai Pawl (KKP) te’n zil ngal ding ati zia un Pathian kiang ah kipak thugenna leh latna nei a hi. Zia chu Rev.C.Zoramawia, Administrative Secretary & Consultant, Manipur Area in ei nei piak ah ama chung leh Lalpa chung in kipak thu ka gen hi. Chun zia la No.1 “Malzawlina Nâk Lal Jesu a hi” ti pen hi a track tawh Thaithak 2017 Pathianni nitak in Jubilee Kochuam Lapawl te’n amasapen nading in Biakin ah Pathian chawihawi na ding in sakna a nei u’i.

2) “HIAT NGAILO HIATSAKTU LALPA” : (Jeremiah 33:3)

Zia Pathian chawihawina lâ hi ka pianna pa lopina gam ah ei chia santa (L) Letkhopau in

Insung leh Kochuam ah hun ah mu phawt leh a gen mun pen te lak ah Bible chang khat chu Jeremiah 33:3 na **“Ei ko in, chutileh hun dawnhu ing ka tin, la het ngai lo thil thupi takte leh kisêlgute hun hil ding ka hi”** ti hi kei insung leh a tute lawtinna tawh kisai ah programme nei na phawt in a sim in a genzing sek hi.

A Bible apat a sim bep hilou in , a byheart in a gen gen sek hi. Ziakiachuh a hi diam a tupa minsakpa Pausuanthang leh a naute’n le a byheart ziang ui. Zia a Bible chang daw bek bek ziak ahin zia chuh ngaikhawk na leh a thu bep hilou in a pakna la’n sak thaw thei leh ka tia Lalpa’n ei piak hi a min lopi nading ah ka hung phuak daw a hi. Lalpa chu lopina chang ta hen.

3) “BITNA LALPA PATHIAN” : (Sam 68)

Phuakna ziak: dated July 17th, 2018 kum hi Lalpa’n chuai talo ding lâ leh thu ei pia’n ka he a hi. David pakna lâ Sam 68 na ka study ma deu in Lalpa Pathian hi a lau te

ding ah tizat um lamtak a hi dan hetchet na, a laulo te ding ah thikthusia a hi dan leh lan ding chi a hilo dan muchian na ahia – min a mu leh a ngaitua / suangtua na khel lam ah nunnem leh zaidaw a hi dan te, lungzing beidawngte ding ah bitna, nunkhawk te ding ah a mun leh hun ah kilang ziang thei zing a hi dan hetchian diak thei na ding ah “Bitna Lalpa Pathian” a hi ti min vua in zia lâ sak thei ding ah gel in zik daw a hi.

Suizaw guallo, genchim theilo, suisen lo Lalpa Pathian a hi. Lalpa lopina chang ta hen. Zia pakna lâ hi Manipur Area Choir (MAC) 2018-2020 te’n zil thiam in mun tamtak ah Lalpa’n a nasepna’n ei matchak piak tai. Laa recording leh Video siam a hi’n, YouTube ah et leh ngaihak thei ding ah kawi a hi.

4) “KOCHUAM - PATHIAN TAKSA” : Kolossa 1:18 (25/07/2017 6:30 pm)

Dated 20/07/2017
(Thursday) nitak lam 2:30 pm
in Pathian in ka kiang ah ei piak

HINNA VÂK

lâ khenkhat a track bawl ding tawh kisai ah a thuchian tak ah type ding ah ka chia lai in ka kiang ah Lalpa'n thu ei hiatsak, a lâ thu ding ei piak a kai (tune) tawh ei piak khawm lou ziak in, zia a chung ah lâ hi Mr. Laldintluanga, Mizoram apat in, Manipur Area committee nei ding ah ka chia sung ah ei siam piak a hi.

Kum 2017 Mizoram Synod khawmpi ding a hin, Manipur Area Choir (MAC) ten la khat sak na ding chance a piau a, zia ding a chun (L) Tual Upa Genlallian in Vaiphei pau ngei ah lâ thak kiphuak thupi "Kochuam Pathian taksa" a um thei chun kipak um mama in ah a tîu a tia, zia kipat a chun zia laa " Kochuam Pathian taksa" thupi mangcha siam hi Lalpa'n ei piak a hi. Ahinla Manipur Area Choir (MAC) te'n sa thei ding ah a lemchang taklou ziak in, zia la siamtu lungthim ah Lalpa'n a gen piak hi Jubilee Kochuam Lapawl te'n a hung zil ua a hung sakdaw piakthei ziak un a chung un kipak um ka sa mama a hi. Music Video Recording le bawl in a um hi.

5) "LIANGVAITE LALPA Sam 91 leh Isai 43 (Nov 5th 2017)" :

Kum 2018 kumthak hi ei mihing te hun sim dan in laklaw hileh kilawm gual in kum thak leh Christmas hi Seppatni (Monday) a hi kha gel gel hi. Chun, kum 2018 kum hi tha khat sung a Pathianni (Sunday) i ti sek uh a tam pen kum ahia, zia chu kum li dan (leap year) i ti sek uh a hi. Zia gual ah mihiam in le i bawl kawm hilou Pathian in leilung pianma ah ala gel suak diam sa hi ka ngaitua na'n a hung ki lang vung vung hi.

7th January 2018 zingkal hin Bible study bawl kawm in Isai 43 na ah Pathian in a mi te vengbit ding ah thutiam leh mi te a tundin kit ngensek dante ka ngaitua na'n a hung lang vung vung ah, tichun zia hi kei ngaitua na bep ah kilang hilo in a lâ a sakdaw thei ding ah ki zik leh pha'n a ti in a Bible zia bung sung leh a marginal note te en in Lalpa'n ka lungthim ah a hung gen daw te ka hung zik daw thaw tai.

Chutichun, Lalpa'n a til apat a insung a hung guanggal dante, a thilsiam him him te, mi ginum te leh mi ginumlo te Khang chia zel ah Lalpa'n a kan zui dante leh Lalpa'n a thil siamte chung ah a lungawi chun suangpi apat tui suak sak ah, tang gawchâk le hampa dim sak ah, mi gentheite, beidawng te lungzinna hivâk tu leh hi zangkhai tu a hi dan hi ka ngaitua in genseng ding gual ei puai. Chun, namtin zosia chung ah vaihawmtu ah'â, Ama tel leh muang tute ding in vaigei ngailou Pathian a hi na te hi a muchiante a dawmsang ngen sek hi ti hin ei zo mama hi.

Ziaziakchun, kum hung kihei a hi na tawh thil zosiate bukim saktu Pathian leh liangvaite Lalpa a hi na neucha bek taklat thei na a hi khak leh ti in zia Pathian thu lopitak tak apat mawl tak ah a lâ sak thei ding ah gualtuak a hi. Zia lâ hi a sa kha tu te leh a sim kha tu te zosia Lalpa'n hun malzawl chiat ta hen.

A aw kai (tune) leh a Solfa tawh ki tuak ah harmonised

bawl thiam lo a ki hi ziak in lawi leh pai dawisak tu te mangcha'n lâ 98 lak in lâ 30 vel a pawl ah zil thei ding in bawl daw thei pan a hi.

I Bible ah Sam 68:32 na ah "Lei ah lenggamte haw, Pathian chawihawi in Lâ sau inla, Lalpa Chawihawina Lâ sa tau in" ti leh Sam 149:6 ah "Pathian chawihawina sâng tak chu a kam un pawt hen..." ti te haw hin ka lungthim a khawi mama hi. Sa thiam leh lâ mi kihilo ma leh Lalpa'n ama gam chanchinpha puanzak na ding ah a sak ah sak daw thei ding ah Lâ ei piak ziakin Pathian chu ka chawihawi takzet hi.

Ama mel en tute a mualphosak lo dan te, a suangtu te'n thilpha a taksap lo ding dan te'u leh khawvel ah khawsa nalai te hin i hinna leh theina te hi Ama a ding ah lân dawng ngam te din, muthei ah lei lam go thil masawmna leh i phulo ei pe ding in tasam ngailo Pathian a hi ti hemil puai ti'u.

Lalpa'n simtute zosia ei malzawl ta hen.

KNP HUANG

Tangphai Presbyterian Church Provisional Synod, Kochuam Numei Pawl Kikhawmpi Lian 13 vei na chu Kangvai Bial ah Kangvai Kochuam Biak In ah Thagau lam Thupi “Sunggil lam ah takna” Sam 51:6 ti mangcha’n 3rd – 5th March 2023 sung in mat ala hi. Kikhawmpi sung in **Rev. C. Lalrinliana i/c Kangvai Bial Pastor, Evan. Sgt. Satbawi, Pi Neikhovak Ex-Chairman CKNP** te apat Pathian thu ngaithak ahi. Thagau lam thupi “**Sunggil lam ah takna” Sam 51:6** hi **Rev. Khaisonthang i/c Kawlhen Pastor Bial** apat ngaithak ahi’n, chun **Valedictory Sermon** hi **Pi Thuamkim, CKNP Chairman pawtdawk** apat ngaithak ahi.

4th March 2023 (Kiginni) sun hun in Vaihawmna Torbung Kochuam Biak In ah nei ahi’n, zia na ahin palai (simtu tawh kigawm ah) mi 190 aki chiakhawm ahi. Provisional Synod aki hi tak na tawh kitawn in I sister Synod Manipur Synod PWF leh Zou Presbyterian Synod PWF apat Palai ni gel in le ahung uap thei ui.

Vaihawm na achun 2023 sung ah Pathian Lalgam nasepna ding ah ki guanggal thupukna kila te chu -

1. KNP Kikaihuaina Dan bu etthak ding thu SEC ah tutto ding.
2. CKNP guanggal na ah An-ngawl pauchapna Kochuam tin ah kitanggual ah mat ding.
3. CKNP in cha leh nau nei tamthei na ding Awareness Campaign guanggal ding.
4. KNP Kikhawmpi Lian zintuntu panpina cheng 30,000 leh KNP Vaihawm Kikhawp zintuntu panpina cheng 20,000 hita ding.
5. 2023 -2024 sung a ding ah Budget (muna ding leh matna) ding in cheng 2,20,500 ahi.

2022 sung ah Tangphai Presbyterian Church Provisional Synod, Kochuam Numei Pawl dinmun chu zia anuai ah gual hi ahi.

Numei zosia zat	: 9,355
Numei dan zokim zat	: 6,342
KNP member tamna pen	: Lamka Bial (595)

April 2023

KNP member tawmna pen : Guwahati (19)
Nisin insung kikhawpna neitheiz zat : 1,009 (29.12%)
Anchang ham ki kawi zat : 2,75,215 Kg
Anchang ham kawi tampen Bial (inkuan khat zel a) :
Jiribam Bial (275 Kg)
KNP in semtu chawm zat (CKNP leh Bial a kigawm ah) : 14

2023-2024 sung CKNP Puitu ding te -

Office Bearer :

- | | |
|----------------------|---------------------|
| 1. Pi Lhingkhovah | Chairman |
| 2. Pi Hoiniang | Vice-Chairman |
| 3. Pi Hoipakkim | Secretary |
| 4. Pi Nengneithem | Assistant Secretary |
| 5. Pi Damjohny | Treasurer |
| 6. Pi Kh. Thianniang | Finance Secretary |

Committee members :

- | | |
|-------------------------|-------------|
| 1. Pi Pautinting | D. Phailian |
| 2. Pi Tingjeneth | D. Phailian |
| 3. Pi Niangjoykim | Kangvai |
| 4. Pi Thethem | Imphal |
| 5. Pi Khawlnei Grace | Mata |
| 6. Pi Veithiannei | Mata |
| 7. Pi Khupneichin | S. Kawtlian |
| 8. Pi Nemsonkim | S. Kawtlian |
| 9. Pi Ngairemmoi | New Lamka |
| 10. Pi Chongneo | New Lamka |
| 11. Pi Lalthazou | D. Khawzim |
| 12. Pi Lalthanpuui | D. Khawzim |
| 13. Pi Pauthianting | Panglian |
| 14. Pi Hatneimawi | Panglian |
| 15. Pi Sita Onkhonieng | B. Phainuam |
| 16. Pi Chinboinu | B. Phainuam |
| 17. Pi Hauchin | S. Munnuam |
| 18. Pi Rody Lamneiphall | S. Munnuam |

KKP HUANG

Khristian Khanglai Pawl 2023 Vaihawm Kikhawp 7 veina Report :

Ni 10th – 12th March, 2023 sung in Khristian Khanglai Pawl Vaihawm Kikhawp 7 veina chu Phailianbung Kochuam Biakin ah lawting tak in nei a hi. Biakna Kikhawp leh Variety Programme te nuamtak in mat a hi. Thagau lam Thupi – **“La hinnau humbitna ding in taidawk un”** – Thilsiam Thu 19: 17 ti hi Rev. P.B. Zosaphara, Consultant, apat in ngaithak a hi. Rev. S. Lama Vaiphei, Executive Secretary, Rev. Th. Samuel Vaiphei i/c Phaipheng Bial leh Rev. Andrew L.R. Kiangte i/c Mata Bial te a pat in Pathian thu hawitak ngaithak a hi. Rev. Ngurthanmawia Sailo, Moderator TPCPS, in 2023 Kumpuan Bu **“Thianthona”** Rev. Summinlian Vaiphei i/c Sugnu Bial in a zik chu, hawanna a nei hi. Pi Betty, Principal V.K. Tawna High a pat in Seminar Thupi **“KKP leh**

Pathian thilsiamte” hawitak ngai thak a hi.

Variety Programme hun in Pro-Pastor Minthianboi, Pro-Pastor C. Kailianson leh Pro-Pastor Genlemthang Suantak te a pat in thugen chawm hawitakte ngaithak a hi.

Vaihawm na feltak ni 11th March, 2023 in nei a hi. Palai mi 157 a kichiakhawm thei hi. Zia hun ahin 2023-2024 sung Budget le siamfel a hi.

Zintuntu Phailianbung Bial te a fel ua, kikhawp hun sung leh Vaihawmna Usher te'n feltak in ei tawi piak ua, Physical Arrangement lam inle kitup leh hawitak in thil bangkim a saifel ziak un kipak um a kisai. Khawmpi mangtute zosia nek leh dawn tui tak ei bawl piak kit ua lungdam a um ma ma hi.

**2022 - 2023 sung ah Khristian
Khanglai Pawl dinmun leh
nasepnate zia gual hi a hi:**

1. Kisimna :

Sl. No.	Kisimna	2022-2023	2021-2022	Punna / Kiamna
1.	Branch um zat	103	101	+ 2
2.	<i>Khanglai Member zat</i>			
	Numei	1, 976	1, 942	+ 34
	Pawsal	2, 719	2, 657	+ 62
	Gawpkhawm	4, 695	4,599	+ 96
3.	<i>Zi Pawsal nei zat</i>			
	Biakin hawng ah	50	54	- 4
	Mundang ah	103	148	- 45
4.	Thunun ah umlai zat	100	76	- 24
5.	Mithi (KKP Member) zat	05	15	- 10
6.	Bible zillai zat	19	18	+ 1

2. Bial KKP nasepna (activities) tangpi :

Bial Puitu ten Branch vethakna, Branch kivetuana, Bial KKP dang ve, Blood donation nei, Yearly Meet nei, Choir night, Bial Meet, Choir Convenor leh Conductor meet nei, Seminar nei, Advance Khristmas Programme leh Advent Khristmas mat, Bial huap Games and Sports nei, Solfa Training, Leadership Training, Seminar, Thugen dan Seminar, Usher Training, Lapawl Kidemna, Damlo te vethak, Bible Quiz guanggal, Pastor Quarters ah Thawlawm kuan, Semtu chawm thei a um kit ua kipak um a kisai.

3. Kumpuan Thupi :

2022 Kumpuan thupi, “Danglam ngam Khanglai” ti hi Khanglai Kikhawp hun lemchang en in, a zillai zilsaktu ding kiguat in zil sek a hipen hi.

4. Pauchap khawmna :

Bial huap ah Pauchapkhawmna guanggal khenkhat a um ui. Anggawl pauchapna nei le a um kit ui. A tamzaw te’n mani

HINNA VÂK

Branch Kikhawp hun in pauchap khawmna nei sek a hi.

5. KKP Day 21st January, 2023 mat dan tangpi :

Bial khenkhat te'n KKP Day Bial huap ah Programme siam in a mang thei ui. Bial khenkhat in KKP Day hi Bial KKP Conference Vaihawmna tawh a kituak ziak in a mang thei puau hi. Nitak Programme siam ah KKP Day mang le a ki-um kit hi.

6. Bial KKP sum mu dan tangpi :

Branch tin apat Budget piak khawm sek, Kikhawp Thawmlawm, talent suk pun, thaphut, Ginna thutiam, KKP Box, Blanket sawp, Nameplate siam, Charity Dinner, Sum law Thakuan, Me minsa zawk, Bial van khel man te a pat leh Bial Standing apat Grant-in-Aid dawng le i um u'i.

7. CKKP Budget leh General Conference panpina :

Bial zosia'n CKKP Budget leh General Conference kithuapina KKP Member 1

zel ah ₹ 10/- i pekim thei ua, kipak um a kisai.

8. Bial sung ah branch te kikhawp dan tangpi :

KKP Handbook in Kikhawp dan chuam chuam a ziltite a pat in KKP Kikhawpna hi nei sek a hi: Sermon, Sharing, Group Night, Kumpulan Thuzilna, Lazil Kikhawp, Fellowship, Pauchap kikhawp, Bible Quiz, Silent Programme, Bible Study ti te in hun mat sek a hi.

Bial huap ah Rotation ah Branch tin a kikhawmsek i um ua, mi tawm ziak hi ding in ginchak a hi. Mi tawm ziaka KKP kikhawpna nei theilo le i um kit ui. Chuleh Branch khenkhat Simhaini Zan ah KKP kikhawp nei a ki-um hi.

9. Report ding ah pawimaw dangte :

Branch khenkhatte mi tawm ziaka din haksa i um ua, Bial khenkhat apat Branch te'n Media Department nei in Weekly News a sua thei u'i. Christmas leh Kumthak Gift insuan ah hawm sek, lawtinna

nei te leh Biakin hawng ah zi/pawsal nei te kipakpina thilpiak piak, Bial KKP Puitu te min zikna ding siam, Outing nei thei, Pastor Quarters â ding thil pawimaw te chawk, Orphanage Home leh Disabilities Home te panpina pe thei te i um ua kipak a um hi.


Report i ngaithakna'û apat

chun Bial dinmun te a kituak vek pua. Ahinla, eimau dinmun a pat panla to zel ah Bial leh Branch ah activities te nei to zel thei in i um ua kipak um a kisai. Maban ale theitawp sua zel ding in i kichial u'i.

Khristian Khanglai Pawl te Pathian in ei umpi in ei puihuai zel ta hen!



CKKP Puitu te leh lawi upa te





SUNNA

UPA PAUKHAWLIAN

(03rd July 1965 – 17th January, 2023)



Upa Paukhawlian hi (L) Lamkhawthang leh (L) Tinnu nupan kal ah piang chapa pani (2) na a hi. Date 03rd July, 1965 in New Luongpi khua a la piang hi. Leikot Kochuam Biak in in Date 12th April, 1981 ni'n Rev. Lamkhokai khut in Baptisma a la chang a, Date 11th April, 1993 in Pi Niangngaiting tawh Rev. Thangkohen khut in a la kikhutsui ui. Kum 2011 ah Kochuam Upa ding ah teltin ah um in, zia kum ma ma ah Date 09th October, 2011 ah Rev. Biak Sailo, Moderator khut in Lengluong Kochuam Upa ding ah Ordained ahi. Kum 2016 ah D. Khawzim ah hung pem lut in, Kum 2019 ah Kochuam Upa ding ah tel daw ah um kit in. Zia kum Tanggam Presbytery Khawmpi na puanlat kit ah um in, zia nung ah chun Kochuam leh Bial sung ah mawpuak na pawimaw tak tak te tuto zel in, Pathian na lunglut tak leh taima tak ah sem zing in, Date 02nd January, 2023 Kumthak programme mat zing lai in Doctor lam ah chiapi in, In mun in a ki enkawl zing ah, gim lam manaw deu deu in, District Hospital ah puak lut ah um in, chawmkhat le ki enkawl man lo in, Date 17th January, 2023, 01:30 AM vel a khan ana seppiak Pathian kiangin ei la chawldam san tai.

Vuilian na Programme hun chu, Gangpimual Kochuam TPC mun ah Rev. Nicky Lalremmawia in a mang hi.

April 2023

I. D. Khawzim Kochuam ah mawpuakna ala neite :

Kum 2019 : Kochuam Synod Treasurer
Kum 2020 - 23 : Building Committee Chairman
Kum 2022 : Kochuam Secretary
Kum 2023 : Kochuam Vice Chairman & Sunday School
Superintendent

II. D. Khawzim Pastor Bial ah mawpuakna ala neite :

Kum 2021 : Bial Secretary a la pang hi
Kum 2022-2023 : Bial Treasurer

III. Tanggam Presbytery ah mawpuakna ala neite :

Kum 2022-2023 : Standing Committee a pan laitak

IV. A chate :

1. Thongminthang
2. Lhingmankim
3. Songlalsiam, h/o Tingngailem
4. Hatneihoi
5. Lhingneichong, w/o Thangchinlal
6. Mangmalsom

*Report petu
Upa Lalson
Secretary
D. Khawzim Kochuam*